



Groupe parlementaire

N°8072  
Entrée le 06.06.2023  
Chambre des Députés  
Déclarée recevable  
Président de la Chambre des Députés  
(s.) Fernand Etgen  
Luxembourg, le 06.06.2023

Här Fernand Etgen

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, de 6. Juni 2023

Här President,

esou wéi d'Chambersreglement et virgesäit, bieden ech lech, dës parlamentaresch Fro un den Här Energieminister an d'Madamm Finanzminister weiderzeleeden.

Dat aktuell Budgetsgesetz "*Loi du 23 décembre 2022 concernant le budget des recettes et des dépenses de l'État pour l'exercice 2023*" gesäit am Artikel aacht eng degressiv taxe d'abonnement vun 0,04 bis 0,01 Prozent fir OPCe vir, wann dës tëschent fënnef a 50 Prozent oder méi vun hire Verméigenswäerter a sougenannt nohalteg Investissementer placéieren, déi am Artikel dräi vum EU-Reglement (UE) 2020/852 virgesi sinn. Allerdéngs kënnen si an deem Zesummenhang keng Investissementer urrechne loossen, déi op Kategorien entfalen, déi an de Sektione 4.26 bis 4.31 vun den Annexen I an II vum "*Règlement délégué (UE) 2021/2139*" vum 7. Juni 2021 opgezielt ginn.

Déi viséiert Paragraphe betreffe virun allem Technologien aus dem Beräich vun der Nuklearenergie, déi ënner anerem kënnen agesat ginn, fir Atomkraaftwierker ze moderniséieren an och fir stëllgeluechten Anlagen zeréckzebauen. Duerch dës Dispositioun dréckt d'Regierung hir allgemeng Ofleennung vun der Bewäertung vun der Atomenergie als ëmweltfrëndlech Energieform an der EU-Taxonomie aus. Esou wéi et mir zougedroe gouf, huet d'Regierung allerdéngs rezent e Subsid un eng Lëtzebuurger Firma ausbezuelt, déi am Beräich vun deenen Technologie fuerscht.

An deem Zesummenhang géif ech der Regierung gär dës Froe stellen:

- 1) Kann d'Regierung d'Transaktioun vun deem Subsid bestätegen? Falls jo, kann d'Regierung dann elaboréieren, wéi esou eng Entscheidung sech mat de restriktive Konditiounen vun der Taxe d'abonnement verdréit? Wéi motivéiert d'Regierung an deem Fall déi Decisioun, d'Investissementer op Basis vun de Sektione 4.26-4.31 vun der zitierter EU-Legislatioun weiderhin als net nohalteg anzestufen?
- 2) Wéi beurteelt d'Regierung d'Gefor, datt duerch dës Decisioun net méi genuch an d'Moderniséierung vun Atomkraaftwierker investéiert gëtt, an domat och de Sécherheitsrisiko potenziell zouhëlt?
- 3) Gesäit d'Regierung an deem Zesummenhang net d'Geleeënheet fir eng allgemeng Revisioun vun der Taxe d'abonnement, notamment fir d'Finanzplaz Lëtzebuerg vis-à-vis vun der Konkurrenz vun Dublin ze stäerken?

- 4) Spezialfongen (FIS) profitéieren op Basis vum Artikel 68 vun der "*loi du 13 février 2007 relative aux fonds d'investissement spécialisés*" automatesch vun enger taxe d'abonnement an Héicht vun 0,01 Prozent, un deenen Investisseuren, déi op Basis vun engem klengen oder mëttleren Akommes spueren, opgrond vun de Prädispositiounen esou wéi se am Artikel 2. (1) vun deem virdrun zitéierte Gesetz festgehale sinn, awer net kënne participéieren. Gesäit d'Regierung op där Basis eng Diskriminatioun vu Leit mat manner Verméigen duerch den Artikel aacht vum aktuelle Budgetsgesetz? Falls net, firwat net?

Mat déiwem Respekt,



Fred Keup  
Deputéierten



**Gemeinsam Äntwert vum Minister fir Energie, Claude Turmes, a vun der Finanzministesch, Yuriko Backes, op d'parlamentaresch Fro n°8072 vum 6. Juni 2023 vum éierewäerten Deputéierte Fred Keup iwwert "Taxe d'abonnement dans le cadre des énergies nucléaires"**

- 1) Kann d'Regierung d'Transaktioun vun deem Subsid bestätegen? Falls jo, kann d'Regierung dann elaboréieren, wéi esou eng Entscheidung sech mat de restriktive Konditiounen vun der Taxe d'abonnement verdréit? Wéi motivéiert d'Regierung an deem Fall déi Decisioun, d'Investissementen op Basis vun de Sektione 4.26-4.31 vun der zitierter EU-Legislatioun weiderhin als net nohalteg anzestufen?**

De Wirtschaftsministère bestätegt, dass e Lëtzebuerger mëttelstännegen Traditiounsbetrieb an deene leschten 3 Joer 2 Subventiounen krut fir Fuerschungsprojeten ze ënnerstëtzen, déi am Beräich vun Equipementen an Technologien, déi am Secteur vun der Sécherheet vun den Industrieanlagen hir Uwendung fannen an dobäi och kënnen an Atomkraaftwierker zum Asaz kommen.

Nieft dësen 2 Projeten, huet dës Lëtzebuerger Betrieb, mat sengen iwwer 70 héich qualifizéierte Mataarbechter, och aner Subventiounen krut, fir den zanter iwwer 50 Joer undauernden Innovatiounswëllen ze ënnerstëtzen an esou innovativ Produkter a Servicer an diverse Beräicher ewéi dem Aerospace, dem Ultra-Liichtbau oder och der Mécanique de haute précision kënnen weltwäit unzebidden – mam Stempel "Made in Luxembourg".

- 2) Wéi beurteelt d'Regierung d'Gefor, datt duerch dës Decisioun net méi genuch an d'Moderniséierung vun Atomkraaftwierker investéiert gëtt, an domat och de Sécherheitsrisiko potenziell zouhëlt?**

Duerch des Decisioun kréie gewëss Investissementen e steierlechen Avantage, well ze zu enger sécherer an nohalteger energieetescher Transitioun bäidroen. Vu dat Investissementen an Atomkraaft aus der Siicht vun der Regierung net nohalteg sinn, kréien se dës Bonus net, wat politesch koherent ass.

Wat d'Investitiounen an d'Sécherheet vun den Atomkraaftwierker ugeet, esou hunn d'Bedreier generell mat der Mise en Service vun den Anlagen d'Obligatioun fir finanziell Récklagen unzeleeën, fir des ze bezuelen. Dat steet deemno net an Zesammenhang mat Taxonomie-Regelen.

**3) Gesäit d'Regierung an deem Zesammenhang net d'Geleeënheet fir eng allgemeng Revisioun vun der Taxe d'abonnement, notamment fir d'Finanzplaz Lëtzebuerg vis-à-vis vun der Konkurrenz vun Dublin ze stäerken?**

D'Regierung gesäit d'Kompetitivitéit vun der Lëtzebuenger Finanzplaz als ee Ganzt. Dës Fro léisst sech net reng op Steiermesurë reduzéieren.

D'Prioritéit fir de Fongesecteur bléift et, déi néideg Konditiounen ze schafen, fir dass Fongemanager zu Lëtzebuerg eng ideal Juridictioun fanne fir hir Fongen opzeleeën a weltwäit ze verdreiwen.

De Finanzministère probéiert och ëmmer sécher ze stellen, dass de legale Kader zu Lëtzebuerg et der Fongenindustrie erlaabt sech weider ze entwéckelen an nei Opportunitéiten ze ergräifen.

An deem Sënn, huet d'Regierung och rezent e Gesetzesprojet op den Instanzewee gi, fir eise Fongegesetzskader weider ze moderniséieren an domat d'Attraktivitéit an d'Kompetitivitéit vun eiser Finanzplaz ze stäerken.

Ënner anerem ass an dem Gesetzesprojet och virgesi fir eng Rei vu Fongen op den taux préférentiel vun 0,01% erof ze setzen oder ganz vun der Taxe d'abonnement ze befreien. Hei geet et virun allem och drëm déi international Fongenindustrie ze encouragéieren sech fir Lëtzebuerg ze entscheeden, wann se nei Produiten opleeën, déi duerch d'EU Reglementatioun geschaaft gëtt. En Beispill hei sinn déi sougenannten ELTIFS (European Long-Term Infrastructure Funds), déi Investissementer an Infrastruktur, y compris erneierbar Energie, férdere sollen.

Méi generell wäert de Finanzministère och weiderhin europäesch an international Entwécklung vum Noem suivéieren an, am Dialog mam Secteur, punktuell Upassungen am Lëtzebuenger Fongekader maache, fir d'Kompetitivitéit vum Secteur ze erhalen an ze stäerken.

**4) Spezialfongen (FIS) profitéieren op Basis vum Artikel 68 vun der "loi du 13 février 2007 relative aux fonds d'investissement spécialisés" automatesch vun enger taxe d'abonnement an Héicht vun 0,01 Prozent, un deenen Investisseuren, déi op Basis vun engem klengen oder mëttleren Akommes spueren, opgrond vun de Prädispositiounen esou wéi se am Artikel 2. (1) vun deem virdrun zitéierte Gesetz festgehale sinn, awer net kënnen participéieren. Gesäit d'Regierung op där Basis eng Diskriminatioun vu Leit mat manner Verméigen duerch den Artikel aacht vum aktuelle Budgetgesetz? Falls net, firwat net?**

Hei besteet keng Diskriminéierung. De Steiersaz vun der Taxe d'abonnement gëtt net op Basis vum Typ vun Investisseuren entscheet, mee iwwert den Typ vu Fong.

Verschiede Fongen si just fir Investissementer a kotéiert Wäertpabeiere geduecht, déi sougenannt UCITS, wärend aner Typpe vu Fongen, wéi z.B. de FIS, et erlaben a manner liquid an net kotéiert Aktivaen ze investéieren. Zum Schutz vum Investisseur hu sougenannt "Retail" Investisseuren haaptsächlech Accès op Fongen déi méi liquid sinn. Dëst ass och esou vum europäesche Recht virgesinn a gëtt streng vun de Regulateure kontrolléiert fir ze verhënneren, dass Clientë Produiten ugebuede kréien déi net hirem Risikoprofil entsprechen.

D'Taxe d'abonnement ass eigentlech en droit d'enregistrement op d'Handelbarkeet vu Wäertpabeieren. Si representéiert also ënnert eng anerer Form den droit d'enregistrement, zu där d'Cessioun oder d'Iwwerdroe vu Wäertpabeiere féiere géif. An dem Sënn, ass hiren Objet, d'Besteuerung vun der presuméierter Circulatioun vun Aktien. Prinzipiell hu Fongen déi a kotéiert Wäertpabeieren investéieren, méi eng grouss Circulatioun vun Aktien, sou dass en méi héijen Taux vun der Taxe d'abonnement principiell justifiéiert ass vis-à-vis vu Fongen déi a manner liquid Aktivaen investéieren.

Och wa fir UCITS en Taux vun 0,05% gëllt, sou huet d'Regierung Exoneratiounen agefouert, déi besonnesch och Retail Investisseuren ze gutt kommen. Dat ass notamment de Fall bei sougenannten Exchange Traded Funds (oder ETFs) déi en Indice boursier suivéieren, an duerch hiren nidderege Käschtepunkt besonnesch fir Retail Investisseure geduecht sinn. A mat den neie gesetzlechen Upassungen, wäerten Exonératiounen agefouert gi fir den neien europäesche Pensionsproduit (PEPP) a fir ELTIFS. Och dat kënnt Spuerer mat manner Verméigen ze gutt.

Lëtzebuerg, den 10. Juli 2023  
(s.) Claude Turmes  
Minister fir Energie